

義勇乃勒兩粵勁士分爲三軍副總兵張君
經將中軍翁君萬達監之叅將李君榮將左
軍副使鄭君宗古監之都指揮白君泫將右
軍僉事李君文鳳監之勒滇南勁士分爲三
軍都指揮胡君紹將中軍副使鮑君象賢監
之都指揮方君策將左軍副使鄭君騶監之
都指揮王君立將右軍副使張君綱監之而
幕府遂穆進止機宜則惟翁君與焉于是八
蠻五獠侮食左言之長吳鈞越棘狼羆烏章

之士伐牡介象雲梯樓船之具莫不嶽嶽從
從脉列蝟合箕張翼舒闐駢乎桂海交人聞
之愈益大懼登庸之使疊跡轅門攄裸秉榛
懇以降請轅門僉議以爲在古降儀或牽羊
以表順或舁櫬以請誅彷彿于斯乃見惻抱
登庸頓首敬諾轅門乃啟鎮南之關莫龍興
抗黃幄陳兵森扈登庸徒跣囚首白組繫頸
稽顙稱曰臣斧鑕遊魂也無異圜豕陛下不
發乘輅曳尺纏牽而刳之懸首藁街以昭誠

不諛是陛下以不忍羣黎之故而宥微臣微
臣幸藉羣黎以延殘喘臣聞命以來魂魄颺
喪悽悽荒懇又不足以感格皇乾重煩訊使
詰責誠僞死罪死罪復更何言臣今共順之
情鰥鯨之狀繪圖不足以爲獻割心不足以
自明惟陛下哀之臣率土編民也戮之惟命
俘而放之四荒惟命若以天地之量覆螻蟻
宥之故穴亦惟命謹以黎氏所侵四裔之地
先朝所錫金印遣從子文明表獻臣昧死言

不勝隕越轅門僉議以爲其辭順其儀恭其
秉無僞違卽征之天之命也服而舍之武之
經也爲之解組而遣之按兵不進以狀聞皇
帝若曰嗚呼皇天以予一人撫鞠四海匪威
力是憑匪玉帛山海是愛惟蒼生塗炭是憂
黎氏守職無狀衆叛親携馴至天絕莫氏宜
力比戶安堵朕亦嘉之其革王爵易國號置
都統司以莫氏爲都統使世掌其土以共王
命詔至諸軍解嚴南土驩呼颺馳鼎沸矣是

役也君子以爲莫氏知命者四繫組以請死也歸地以贖罪也函印而獻之以完寶也不貢方物以明畏也詩曰畏天之威于時保之其得不死而且世官也宜哉當兵事之初興也嘗以藩僚分守左江悉厥巔末昔愍其勞而今欣其靖也迺述而銘之曰粵有交州最爾羸介三代之隆擯於荒外羸秦畧遠乃闢其疆聲教漸被歷漢而唐五季紛紜土酋竊據涉宋而驕益煩邊慮大明受祚陳氏奉寶

皇祖嘉之俾仍舊封季犛賊逆毒蔓雕題文
皇征之措戮鯨鯢索胤于陳絕不可得迺建
省垣約以繩墨黎利再叛詐擁陳後宣廟慈
弘包荒四宥錫爵給印樹爲藩邦三葉而墮
遂覆厥宗莫氏承之諸彝膺懷不請而禪于
義則乖皇帝赫怒渙號徵師如雷如電岳峙
海馳緯武經文維兩司馬矯矯元侯從天而
下司馬有令旣嚴旣明翊用翁君廉信以匡
鋪敦義勇鷹搏虎奔朱登日麗元甲雲屯藉

今戡之倏如畦耨載鞠載詢蓄武不究交人
聞之喙喙嚶嚶傾巢舉落俯愬仰干蓬跣繫
組蛾伏而進順效牽羊請同昇櫬匪寇匪篡
庶幾有辭皇帝憐之遂以德來乃削其爵而
畀世官比于內吏輯我龍編交人驩呼曰父
母且完我婦子築我室廬赫赫天威盱眙而
在濺濺天恩含哺以戴如春之育如海之容
訓爾子孫惟王之供虞格苗民淹于七旬交
人來款曾不浹辰商伐鬼方三年而服宰割

交州曾不遺鏃我紀其事勒之貞珉伏波銅
柱又何足云

平南碑記

黃佐明

聖皇二十七祀歐陽公涖百粵而穌其民旣
乃戢兵遠近咸有寧宇甫踰碁克有戎勲先
是安南內亂其族目莫正中帥衆來奔居無
何逆黨范子儀謀挾之以爭立煽誘其海東
諸蠻蜃合豕突擾我欽州僇官掠地奪貨圍
城恣厥矯虔邊鄙其聳公至聞變亟圖之乃

與總戎平江伯陳公議曰制勝之道務在萬
全欽接蠻壤無山海阻隔我兵潛度當犁其
巢彼以舟爲長技不先破之而深入其阻則
主客之勢旣弗相當水陸之行又弗相及其
何以全取勝未戰而算惟形是度敵在吾目
中矣於是密速海道副使黃君光昇躬募東
莞新會戈船百有六十艘器械餼糧胥飭以
備已於事而竣乃選習水戰之將以都指揮
俞大猷董之環集甲士務飽而嬉已於事而

竣乃行叅政沈君應龍分守叅議方君民悅
暨廉守胡鰲相與襄之密機事戒輕進嚴烽
堠盛間諜比次其艘授以成算已於事而竣
乃僉謀以大艘泊冠頭嶺之濤以伺其來賊
果至龍門港跳梁諸村如公所度云乃僉謀
都帥移戈船泊鳳凰江以扼其必出之衝遇
賊兵逆戰大敗之俘斬奔潰隻舟莫返公聞
捷又度其勢必危渙而易流患也卽申命都
帥督水陸兵徑擣其春蘭之穴以殲渠魁將